

Na osnovu Pravilnika o utvrđivanju kriterija za dodjelu naknada zaposlenicima Univerziteta u Sarajevu za slučaj smrti, teške invalidnosti ili teške bolesti zaposlenika ili člana njegove uže porodice, Upravni odbor Fakulteta islamskih nauka Univerzita u Sarajevu je na Prvoj sjednici održanoj 14. januara 2016. godine usvojio:

PRAVILNIK

o naknadama uposlenika Fakulteta islamskih nauka Univerziteta u Sarajevu za slučaj smrti, teške invalidnosti ili teške bolesti uposlenika ili člana njegove uže porodice

Član 1.

Ovim pravilnikom utvrđuju se kriteriji za dodjelu naknada uposlenicima Fakulteta islamskih nauka Univerziteta u Sarajevu za slučaj smrti, teške invalidnosti ili teške bolesti uposlenika ili člana njegove uže porodice.

Naknada za slučaj smrti

Član 2.

U slučaju smrti uposlenika ili člana njegove uže porodice isplaćuju se troškovi dženaze u iznosu od najviše četiri prosječne mjesečne plate isplaćene u Federaciji za prethodna četiri mjeseca prije donošenja rješenja o isplati te naknade.

Naknada za slučaj smrti iz stava 1. ovog člana isplaćuje se članovima uže porodice iz člana 4. tačka 1), 2) i 3) bez obzira da li su članovi uže porodice živjeli u zajedničkom domaćinstvu sa uposlenikom.

Naknada za slučaj teške invalidnosti ili teške bolesti

Član 3.

1) U slučaju nastanka teške invalidnosti ili teške bolesti uposlenika, ili člana njegove uže porodice, u skladu s raspoloživim sredstvima, može se isplatiti jednokratna novčana pomoć u visini njegove 3 (tri) plate isplaćene u prethodna tri mjeseca ili 3 (tri) prosječne mjesečne plate isplaćene u Federaciji, ako je to za uposlenika povoljnije.

2) Uposleniku se može, u skladu s raspoloživim sredstvima i na osnovu saglasnosti dekana Fakulteta, isplatiti dio ili ukupni troškovi liječenja teške invalidnosti ili teške bolesti u zdravstvenoj ustanovi u kojoj je on platio troškove tog liječenja. Troškovi liječenja se isplaćuju na osnovu fakture ili računa zdravstvenih ustanova u kojima je liječenje obavljeno.

3) Pod teškom bolešću iz stava 1. i 2. ovog člana podrazumijevaju se sljedeće bolesti: akutna tuberkuloza, maligna oboljenja, endemska nefropatija, hirurška intervencija na srcu i mozgu, sve vrste degenerativnih oboljenja centralnog nervnog sistema, infarkt (srčani ili moždani), oboljenja mišićnog sistema, paraliza i druge teške bolesti određene Odredbom Federalnog ministarstva zdravstva o listi teških bolesti, odnosno teških tjelesnih povreda na osnovu kojih se ostvaruje naknada za slučaj teške invalidnosti ili teške bolesti ("Sl. novine FBiH" broj: 30/05) kao i teške tjelesne povrede. Bolest, odnosno teška povreda se dokazuje na osnovu dijagnoze zdravstvene ustanove.

4) Pravo na jednokratnu novčanu pomoć iz stava 1) ovog člana, po osnovu teške invalidnosti ostvaruje se za utvrđeni stepen invalidnosti od najmanje 60 %.

5) Jednokratna novčana pomoć iz stava 1) ovog člana, može se dodijeliti i uposleniku koji je operisan od bolesti koje nisu obuhvaćene odredbom stava 3. ovog člana ukoliko je takva operacija izvršena iz zdravstvenih razloga i po preporuci ljekara.

6) Prioritet u odobravanju novčane pomoći iz stava 1) ovog člana imaju uposlenici u odnosu na članove njihove uže porodice.

Član 4.

Pod članom uže porodice iz člana 3. ovog pravilnika podrazumijevaju se sljedeći članovi porodice uposlenika:

- 1) suprug(a), ako žive u zajedničkom domaćinstvu;
- 2) djeca do 18, odnosno 26 godina starosti, ako se nalaze na redovnom školovanju i nisu u radnom odnosu, a djeca nesposobna za rad, bez obzira na starosnu dob, ako žive u zajedničkom domaćinstvu;
- 3) roditelji, ako žive u zajedničkom domaćinstvu sa zaposlenikom;
- 4) braća i sestre bez roditelja do 18, odnosno 26 godina starosti, ako se nalaze na redovnom školovanju i nemaju drugih prihoda, već ih korisnik naknade stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na starosnu dob, pod uslovom da sa njima živi u zajedničkom domaćinstvu;
- 5) unučad pod uslovima iz tačke 2) ovog člana, ako nemaju roditelje i žive u zajedničkom domaćinstvu s korisnikom naknade.

Član 5.

Ovaj pravilnik stupa na snagu danom usvajanja od Upravnog odbora Fakulteta.

Predsjednik Upravnog odbora:
Muftija Vahid Fazlović

Broj: 01- UO-1-64/16
Datum 14.01.2016. god.